



22. oktober 2025

UKA2025/163

**Nunatsinni atuarfinnut namminersortunut aningaasatigut tapiissuteqartannginnissamut Naalakkersuisut inatsisissatut siunnersuummik suliaqaqqullugit Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2026-mi saqqummiunneqassaaq.**

(Inatsisartunut ilaasortaq Kuno Fencker, Naleraq)

Siumut siunnersuuteqartumut, Naleqqameersumut Kuno Fenckerimut qujavoq.

Meeqqat atuarfiat pillugu, Siumup politikikkut inissisimaffigiuarsimasaa tassaavoq, meeqqat atuarfiat Nunatsinni meeqqanut tamanut pitsaanerpaamik atuartsinermik tunniussaqaassasoq, aamma ullutsinnut malinnaalluni atuarfeqarfik ingerlanneqaassasoq. Atuarfik inuiaqatigiinni ataatsimoorfiusoq pingaaruteqarpoq, taassami inuiaqatigiinni paasinninnermut ataatsimoortumut aamma ataqatigiissitsinnermut annertuumik atuarfik suliassaqarpoq.

Atuarfiit namminersortut angajoqqaat pilersissimasaat tapiiffigineqartarunnaarnissaanut siunnersuut Siumup isumaqatiginngilaa. Siumut isumaqarpoq taamaaliornikkut angajoqqaat innuttaasullu, meeqqat qanoq atuartinneqarnissaanut periarfissarsiuussisinnaanerit tunngaviummik innarlerneqaassasoq. Meeqqat atuarfiat aamma atuarfiit nammeneq ingerlasut imminnut akkerliittutut isigineqassanngillat – imminnut tapertareqatigiillutik ingerlasussaapput, aamma tamanna demokratiimik ingerlatsinitsinnut assigiinngiaartuunitsinnullu ersersitsisuuvoq.

Angajoqqaajusut meeqqamik qanoq atuartinneqarnissaanut toqqaasinnaatitaanerit, kiffaanngissuseqarnitta tunngavippiaanut ilaavoq. Pisinnaatitaaffik taanna nunarsuarmi tamani inuttut pisinnaatitaaffinnut ilaavoq. Pisinnaatitaaffik taanna taamaallaat inunnut isumaqalersinnaavoq, toqqaanissamut aningaasaqarnikkut periarfissaqarneq oqilisaakkaanni. Kiffaanngissuseqarneq - meeqqat aturfissaannik toqqaanissamut aamma atuuttoq - aningaasatigut nukittunerusunut kisimi atuutsinneqaassanngilaq. Amerlanerpaat peqataasinnaanerit tunngaviummik illersussallugu inuiaqatigiittut soqutigisaraarput.



Siumut isumaqarpoq Naleqqameersup siunnersuutaa arlalitsigut isumakulunnartoq, tassami innuttaasut pisinnaatitaaffiinik killilersuiniarneruvoq. Assingusunimmi arlalippassuartigut – innuttaasut toqqagassaqaqqullugit – ullumikkut aaqqissuussisimavugut apeqqusersunngisatsinnik. Naalakkersuinikkut tullinnguullugit suut killilersulissanerivut apeqqutaaginnassaaq, tassami innuttaasut kiffaanngissuseqarlutik namminnerlu isummersinnaanissaminnut periarfissarpassui assinganik killilersorniarneqalersinnaapput:

Inuiaqatigiittut isumaqatigiissutigisimavarput efterskolit, højskolit, sunngiffimmi sammisassa qarnerit, ilinniarneq, meeqqeriviit assigisaallu aningaasalersuiffigineqarnerat ataatsimoorluta soqutigisarigivut.

Aaqqiissutit taamaattut innuttaasut pisinnaatitaaffiat ataqqillugu toqqaasinnaaneranut periarfissiissutaapput – aaqqissuussinerit tamakku immikkoortitsisutut isigigunangilagut, periarfissiissutaappummi. Taamaattumik meeqqat atuarfii namminersortut kisimik immikkoortissallugit pissusissamisuunngilaq, tassami angajoqqaat innuttaasullu aningaasatigut taperserneqarnerat tassani peerneqassaaq, taamatullu iliortoqassappat angajoqqaat tunniusimalluartut peqataaffigisinnaasaat toqqarsinnaasaallu annikinnerulersinneqassapput, minnerunngitsumik meeqqat periarfissaat ilanngullugit.

Siumup pingaartippaa Nunatta ilinniartitaanikkut politikeqarnera sanngiillisarneqassanngitsoq. Aaqqissuussisimanerput tatiginninnermik, pitsaassuseqarnermik ataatsimullu akisussaaqatigiinnermik tunngaveqarput. Tamanna nukittorsarneqarsinnaanngilaq killilersuinikkut periarfissanillu ikilisaanikkut. Tamattaana kivitassarput, aamma meeqqat atuarfiat pitsaanerpaamik ingerlanneqartoq angajoqqaanillu toqqassallugu orniginartinneqartoq pilersissallugu pisussaaffigaarput. Taamaattumik atuarfinnut namminersortunut pisortat tapiissuteqartarnerat ingerlaannassaaq, aamma taamaassaaq atuarfiit pineqartut meeqqat atuarfianni piumasaqaatinut angummassinnaappata – aamma meeqqanut tamanut ammatinneqarpata inuiaqatigiinnilu ilinniartitaanermut assigiinngiaartuunitsinnullu nukittorsaaqataappata.

Meeqqat atuarfiannut namminersortunut tapiissutigineqartartut, ilinniartitaanermut aningaasaliissutit tamakkiisumik isigigaanni annikitsuupput. Taamaakkaluartoq angajoqqaat kiffaanngissuseqarnissaanut aamma atuarfiit qanoq nutaaliorluni ingerlanneqarsinnaanerivut pingaaruteqarput.

Meeqqat atuarfii tapersersorpavut; efterskolit, højskolit assigisaallu assigalugit, meeqqat atuarfii tapiissuteqarfigineqartassapput. Aatsaat taamaaliorutta naligiinnerunissamik tunngavigisavut, kiffaanngissuseqarnerput aamma ataatsimut akisussaafeqarnerput eqquutissinnaavarput.

Ilinniartitaaneq pitsaasoq, nukittoq kiffaanngissuseqartorlu tassaannngilaq meeqqat atuarfiinik immikkoortitsilluni ingerlatsineq aningaasaliissutinilluunniit piiaaneq – tamarmik meeqqatta ajunnginnerpaamik siunissaqarnissaanut nukerujussuarmik tunniussassaarput.



Taamak oqaaseqarluta siunnersuut itigartipparput.

Qujanaq.

*Lars Poulsen*

*Siumut*